

दिनांक 17.03.2024

समय: 18.50 बजे

आकाशवाणी जयपुर-अजमेर

प्रादेशिक समाचार।

- लोकसभा चुनाव रे मद्दे नजर प्रदेश मांय आदर्श आचार संहिता री पालना करणे खातिर जुट्यो निर्वाचन मेहकमो-प्रोटोकॉल रे मुजब कार्यवाही जारी।
- जिला निवारचन अहलकारां चुनाव ने ले र तियारियां तेज करी-मतदाता जागरुकता गतिविधियां रो भी हो रह्यो है आयोजन।
- प्रदेश मांय न्यारा-न्यारा हादसां मांय चार जणा री मौत।  
अर
- प्रदेशभर मांय फागोत्सव रो उच्छास-खाटू श्याम जी रो फागण मेळो परवान माथे।

000

मुख्य निर्वाचन अधिकारी प्रवीण गुप्ता कह्यो है कि प्रदेश मांय आचार संहिता री पालना पक्की करण खातिर जिला निर्वाचन अहलकार कार्यवाही सरू कर दी है। आज न्यारी-न्यारी पार्टियां रा प्रतिनिधियां ने आचार संहिता अर दूजा विषयां मांय जाणकारी देणे रे पाछे मीडियाकर्मियां ने संबोधित करता व्ह्या **श्री गुप्ता** कह्यो की **आचार संहिता** री पालना करणे खातिर **प्रोटोकाल** रे मुजब कार्यवाही करी जा री है।

-----

वणा कह्यो की इण बार भी दिव्यांगजनों अर 85 बरस सु बत्ती आयु रा मतदातावां ने घरे माथे ही वोट देने री सुविधा दी जावेली। श्री गुप्ता कह्यो कि सगळा मतदाता वोटर हेल्पलाइन ऐप माथे ऑनलाइन वोटर लिस्ट मांय आप रो नाम देख सके है अर इणी ऐप माथे आप रो नाम भी जुड़वा सके है। लोकसभा चुनाव मांय इण बार प्रदेश रा 5 करोड़ 32 लाख सुं बत्ती मतदाता आप रे मत रो प्रयोग करेगा। मुख्य निर्वाचन अधिकारी प्रवीण गुप्ता बतायो कि इण मांय 2 करोड़ 77 लाख सुं बत्ती मोटयार अर लगे टके 2 करोड़ 54 लाख महिला मतदाता है। थर्ड जेंडर मतदाताओं री संख्या 616 है। वठिने 1 लाख 41 हजार 193 सर्विस मतदाता है। चुनाव खातिर इण बार प्रदेश भर मांय 51 हजार 756 मतदान केंद्र बणाया गया है। इण रे साथे ही 1 हजार 95 सहायक मतदान केन्द्र भी बणाया गया है। इण मांय सुं सबसु बत्ती 2 हजार 611 मतदान केन्द्र बाड़मेर लोकसभा खेतर मांय है।

लोकसभा आम चुनाव खातिर नामांकन री आखिरी तारीख सुं 10 दिन पैल्या ताई पूरक सूचियां अपडेट करी जावेली। निर्वाचन अधिकारी बतायो कि वोटर मतदाता सूची मांय आपरो नाम जुडवाने खातिर निर्वाचन आयोग रा **मतदाता सेवा पोर्टल, मतदाता हेल्पलाइन एप अर बीएलओ एप** रो उपयोग कर सके है। श्री गुप्ता बतायो के उम्मीदवार खातिर चुनाव खर्च री सीमा 95 लाख रुपयां ताई करी ज्यी है। खर्चे री निगराणी खातिर आयोग री कानी सुं पर्यवेक्षक नियुक्त कर्या गया है। प्रदेश मांय आदर्श आचार संहिता री पालना खातिर 2 हजार 19 उड़न दस्ता अर 2 हजार 70 स्थैतिक निगराणी दलां रो गठन कर्यो गयो है। ध्यानजोग है कि प्रदेश री 25 लोकसभा सीटां मांय चार अनुसूचित जाति अर तीन अनुसूचित जनजाति खातिर आरक्षित है। वठीने 18 सीटां सामान्य वर्ग खातिर है।

000

निर्वाचन आयोग सर्वोच्च न्यायालय री रजिस्ट्री सुं मिल्या डिजिटल डाटा आज आप री वेबसाइट माथे अपलोड कर दिया है। ऐ डाटां निर्वाचन आयोग री वेबसाइट माथे देख्या जा सके है। निर्वाचन आयोग एक बयान मांय कह्यो है कि सर्वोच्च न्यायालय रा हुकम रे मुजब **राजनीतिक दलां चुनावी बॉड** सुं जुड्योडा डाटा सीलबंद लिफाफा मांय दिया हा अर लिफाफे ने खोल्या बिना आने सर्वोच्च न्यायालय ने सौप्यो गयो हो। न्यायालय 15 मार्च रे हुकम रे मुजब सर्वोच्च न्यायालय री रजिस्ट्री ने ओ डाटा सील कवर मांय फिजिकल माध्यम सुं अर पेनड्राइव मांय चुनाव आयोग ने पाछो दे दियो है।

000

लोकसभा चुनाव रो कार्यक्रम घोषित होवण रे साथे ई प्रदेश रा निर्वाचन अहलकार तैयारियां तेज कर दी है। सवाईमाधोपुर जिला मांय शांतिपूर्ण अर भयमुक्त चुणाव रे मददे नजर जिला प्रशासन धारा 144 लागू कर दी है, जकि 5 जून आधि रात ताई प्रभावी रहवेला। जिला निर्वाचन अहलकार **डॉ. कुशाल यादव आदर्श आचार संहिता** री पालना ने ले र दिशा-निर्देश जारी कर्या है। वठीने बूंदी मांय भी जिला प्रशासन निषेधाज्ञा लागू करी है। डूंगरपुर जिला निर्वाचन अहलकार आज कलेक्ट्रेट सभागार मांय राजनैतिक दलां री प्रतिनिधियां री बैठक ले र **आदर्श आचार संहिता** री पालना रे साथे केई विषयां री जाणकारी दी। टोंक जिला निर्वाचन अहलकार बतायो की आदर्श आचार संहिता रे प्रभावी रहणे ताई सगळा सरकारी अर निजी जगवा माथे

प्रत्याशी कानी बिना अनुमति रे लगायी जावण वाळी प्रचार सामग्री माथै रोक लगा दी है। चित्तौडगढ अर कपासन मांय भयमुक्त मतदान करणे रे लगस सुं **सुरक्षा बल फलैग मार्च** निकाल्यो अर मतदातावां सुं भयमुक्त हो र मतदान करण री अरज करी।

000

लोकसभा चुनाव रे मद्देनजर आकाशवाणी समचार जैपर री कानी सुं मतदाता जागरुकता खातिर संदेश श्रृंखला सरू करी ज्यी है। इण मांय श्रोता संदेश भेज र आमजण ने वोट डालणे खातिर प्रेरित कर सके है। श्रोता आप रा संदेश रिकॉर्ड कर या टाईप कर व्हॉट्सअप नम्बर 94140-52368 माथे भेज सके है।

चुनिन्दा संदेशां ने समाचार बुलेटिनां मांय भेळा कर्या जावेला। इणी कड़ी में आज सुणो म्हाणा सीकर जिला रा एक श्रोता रो संदेश –

000

चुनावों री तारीख री घोषणा रे साथै ही प्रदेश मांय मतदाता जागरुकता रा कार्यक्रमं मांय तेजी आ ग्यी है। इणी कड़ी मांय डूंगरपुर मांय आज जिला निर्वाचन महकमां कानी सुं जागरुकता रैली निकाली ज्यी। स्कूली टाबर अर **स्काउट्स गाइड्स** रैली रे माध्यम सुं मतदान करणे रो संदेश दियो। वठिने श्रीगंगानगर जिला मतदान केन्द्रां माथे खास अभियान चलायो जा रियो है।

000

प्रदेश मांय दो न्यारा-न्यारा हादसा मांय चार जणा री मौत व्हेग्यी। जैपर मांय **दिल्ली-अजमेर एक्सप्रेस राजमार्ग** माथे आज अज्ञात वाहन री टक्कर सुं पति-पत्नी री मौत व्हे ग्यी। हरमाड़ा निवासी पति-पत्नी मोटरसाईकिल माथे सवार हो र सांगानेर जा रीया हा। इण रे चालता ओ हादसा व्ह्यो। वठिने बूंदी जिला रा केशोरायपाटन मांय नहर मांय नावण गया चार टाबर पाणी मांय बैह ग्या। आ मांय सुं दो टाबरा ने लोगां सुरक्षित बारे निकाल लियो, पण दो टाबर नहर मांय बैह ग्या, जका रा शब कोटा नगर निगम रा गोताखोर दल चार घंटे री मशक्कत रे पाछे बारे निकाल लिया। इण हादसे माथै **लोकसभा अध्यक्ष ओम बिरला** शोक जतायो है अर मृतकां रे पिरवार वाळां सुं आप री संवेदना जतायी।

000

दत्तात्रेय होसबोले एक बार फ़ैरू राष्ट्रीय स्वयंसेवक संघ रा सरकार्यवाह चुण लिया गया है। वां रो चयन संघ री अखिल भारतीय प्रतिनिधि सभा कर्यो। श्री होसबोले रो कार्यकाल बरस 2027 ताई व्हेला। अखिल भारतीय प्रतिनिधि सभा रो तीन दिन रो ओ वार्षिक आयोजन नागपुर रा रेशमबाग़ इलाका मांय स्मृति भवन परिसर मांय शुक्रवार सुं सरू व्हयो हो। इण बैठक मांय संघ सुं जुड़्या संगठन मांय डेढ हज़ार सुं बत्ती प्रतिनिधियां री भागीदारी रही।

000

होळी रो त्यौहार नेडो आणे रे साथे ही प्रदेश मांय होळी रो रंग चढण लाग्यो है। न्यारी—न्यारी जगवा माथे फागोत्सव रा आयोजन सरू व्हे गया है। बृज खेतर भरतपुर मांय न्यारा—न्यारा संगठनां कानी सुं होळी महोत्सव रा आयोजन कर्या जा रह्या है, तो वठिने आज खाटू श्याम मिंदर में हल्दी मेहंदी कार्यक्रम रो आयोजन कर्यो गयो। जिण मांय महिलावां एक दूजे ने मेहंदी लगा र होळी उत्सव मनायो अर हल्दी सुं होळी खेल र ब्रज री परंपरा ने निभायो। इण रे अलावा भरतपुर रा खिरणी घाट माथे ब्रज होळी महोत्सव रे तैत मथुरा वृंदावन रा कलाकार मनमोहक फूलां री होळी री प्रस्तुति दे र संमा बांध दियो। इण रे चालता कलाकार वृंदावन री थीम माथे लाडू होळी, अबीर होळी रे साथे ही ब्रज रसिया री प्रस्तुति दे र होळी रे माहौल ने रंगीन बणा दियो। वठिने सीकर जिला रा खाटूश्याम जी मांय चाल रह्यो मेळो आ दिनां परवान माथे है।

आज मेळे रे सातवे दिन फागोत्सव की धूम है। रींगस सुं पदयात्रा कर र आवण वाळा भक्त तोरण द्वार माथे गुलाल सुं होळी खेल रह्या है। वठिने केई भक्त बाबा श्याम रे भजनां माथे नांच रह्या है। मेळा मांय अबे ताई छह लाख सुं बत्ती श्रद्धालु दर्शन कर चुक्या है। खाटू मांय खास मेळो 20 मार्च ने भरेला। वठिने बाड़मेर मांय भी आं दिनां फागोत्सव री धूम है। विदेशी सैलाणी भी होळी रे रंग मांय रंग्या निजर आ रह्या है।

000

प्रदेश मांय केई ठौड़ां माथे तापमान मांय बधोतरी होणे सुं गर्मी रो असर बध ग्यो है। एक—दो ठौड़ां ने छोड लगेटके सगळी जगह बत्ती ऊं बत्ती तापमान 30 डिग्री सेल्सियस सुं ऊपर दर्ज करी ज्यो। मौसम केन्द्र जयपुर रे मुजब लारला 24 घंटां मांय सब सुं बत्ती 35 दशमलव 6 डिग्री सेल्सियस तापमान फलौदी मांय दर्ज करी ज्यो। इण रे अलावा बाड़मेर मांय 35 दशमलव 5, डूंगरपुर मांय 34 दशमलव 2, जैसलमेर

मांय 33 दशमलव 5, जोधपुर मांय 32 दशमलव 5, चित्तौढगढ मांय 32 डिग्री सेल्सियस तापमान दर्ज करी ज्यो। वठिने राजधानी जैपर मांय पारो 30 दशमलव 7 डिग्री सेल्सियस दर्ज कर्यो गयो। प्रदेश मांय आवण वाळ एक सप्ताह तांई मौसम शुष्क रहणे री आस है।

000

भरतपुर मांय लोहागढ केसरी कुश्ती दंगल रो आयोजन कर्यो गयो। दंगल मांय राजस्थान रे अलावा उत्तर प्रदेश, हरियाणा अर दिल्ली रा 120 पहलवान भाग लियो। लोहागढ केसरी, कुमार किशोर अर बसंत खिताब री व्ही कुश्ती दंगल रे चालता दर्शकां अर पहलवाना ने भी मतदान री शपथ दिलाई। साथै ही 18 बरस री आयु पूरी कर चुक्या युवावां सुं मतदाता सूची मांय नाम जुड़वाण री अरज करी है। दंगल मांय रोमांचकारी मुकाबलां मांय फाइनल कुश्ती जीतण वाळ पहलवानां ने **गुर्ज**, **पट्टा** अर **प्रोत्साहन राशि** दे र पुरस्कृत कर्यो गयो। कुश्ती दंगल ने देखण खातिर घणी तादाद मांय दर्शक लोहागढ स्टेडियम पहुंचया।

000